

8N3-2-059

Gregor

KANTIKOU NEVEZ

ha Pedennou evit Hent ar Groaz

GANT

EUR MISSIONER BREIZAD



KEMPER

MOULLET E. ET DE KERANGAL

1908

Kantik en honor d'ar Zakramant (p. 1).



O Sakra-mant burzu-duz, Leac'h omp ma-get gant




Je-zuz ! Ennhan e-ma Hor Zalver ; Kre-di a ran var he



c'her ; Enhan ema Hor Zalver ; Kre-di a ran var he c'her.

Kantik Hent ar Groaz (p. 6).




Heuillomp holl, heuillomp a spe-red Je-zuz be-teg



ar C'hal-var ; Sonjomp en he boaniou ka-let, Sonjomp



enn-ho gant gla-c'har ; O Sal-ver leun a ga-ran-tez,



Dre ho kroaz hag ho poa-niou, Grit ou-zomp eur zell a



dru - ez, Pardou-nit hor pec'he - jou.

KANTIKOU NEVEZ

Kantik en honor d'ar Zakramant. (1)

Var an ton gallek : *O l'auguste Sacrement.*

DISKAN :

*O Sakramant burzuduz,
Leac'h omp maget gant Jezuz.
Ennhan ema Hor Zalver ;
Kredi a ran var he c'her. } bis.*

Jezuz, d'an noz kent mervel,
'Ro galloud d'he Ebestel
Da jench ar bara, ar guin
'N he gorf hag he c'hoad divin.

Ar veleien, d'ar gorreou,
A gonsakr gant he gomzou,
Ha Jezuz, mestr braz ar bed,
Ouz ho mouez a zent bepred.

Heb kuitât he varadoz,
E choum aman deiz ha noz ;
Choum a ra en hon touez
Dalc'het gant he garantez.

Euz ar guin hag ar bara
Petra joum ? Ne joum ken tra
Nemet ar spesou dister
A guz korf, goad Hor Zalver.

Aman n'hellomp ket koumpren ;
Ar feiz hebken hor c'helen...
Gant ar feiz sklerijennet,
Ne fazi ket hor spered.

E doare ar sperejou
Eo 'n em laket en hostiou.
Pa vez an hostiou torret,
He gorf sakr n'eo ket rannet.

Neb ia d'ar gommunion
Gant ar pec'hed 'n he galon
A gemer skouer var Judaz,
Hag a ra eun torfed braz.

Mes, pa vez, araok tostât,
Ar goustianz e stad vad,
Unanet gant Hor Zalver
Gwir eurusted e kaver.

Meulomp, karomp, adoromp
Eun Doue ker mad ouzomp.
Red eo sonjal dreist pep tra
En he zonezoun gaera.

Jezuz eo ar Roue braz ;
Adorit-hen var he groaz,
Hag en Ee, hag e myster
Sakramant sakr an Aoter.

(1) Great var batrom eur c'hantik gallek bet savet gant an Den euzuz Grignon Monfort.

Kantik an Oferen.

Ton : *O Kaloun Zakr, pe : Euz a vremen.*

DISKAN :

*Kinnigomp holl ar Zakrifiks,
Gant hor mamm zantel an Iliz,
Sakrifiks divin Hor Zalver,
En em ginnig var an Aoler.*

1. E sakrifiks an oferen,
Jezuz a ra d'he veleien
*Nevezi 'n eun doare dispar
Sakrifiks braz Menez Kalvar.*
2. An Oferen !... *Pebez tenzor !*
Dreizhi Doue a gav henor ;
Dreizhi e teu d'hon enëou
Bennoz Doue gant he c'hrassou.
3. Va Doue, deoc'h e kinnigan
Gant resped an oferen-man,
D'hoc'h *adori* : da ziskleria
Ez oc'h hor Mestr, ha Mestr peb tra.
4. Ouzpenn, 'vit ho *trugarekât*,
Da veza 'n hor c'henver ken mad :
Holl diganeoc'h hon euz bemdez
Madoberou, grassou nevez.
5. Siouaz ! 'n hor buez tremenet,
Omp kouezet mil guech er pec'hed ;
Jezuz, dre verit ho poanion,
Pardounit deomp hor pec'hejou.
6. Dre an oferen-ma ive,
Plijet ganeoc'h, o va Doue,
Pa 'z eo ken paour hon enëou,
Rei deomp aluzen ho krassou.
7. Kinnig a reomp an oferen,
'Vit esomou ar bed kristen ;
Mes, evit *tud ar barrez-ma*
E fell deomp pedi dreist peb tra.

8. Dre nerz ar zakrifiks santel,
Ra vo diouzomp kasset pell
Al leoudouet, ar gassouni,
Ar pec'hed vil, ar vesventi.
9. Ouz an *Anaoun*, o va Jezuz,
Grit ive eur zell truezuz ;
Ha varnho lakit da zisken
Ho koad sakr evel eur c'hlizen.
10. Ra vo heb dale diboaniet
Hor c'herent hag hor mignouned ;
Roit dezho, dre an oferen,
Ar peoc'h a bado da viken.
11. Guerc'hez Vari, va Mamm garet,
E harz ar groaz ken glac'haret,
Va zikourit da skriva doun
Pemp gouli Jezuz em c'haloun.
12. Ha c'houi, holl Zænt ha Sæntezed,
Ha c'houi, holl elez benniget,
Deomp holl roit skoazel ho peden
Da glevet mad an oferen.

Kantik da Zant Jozeph.

Var don : *Guerc'hez sakr.*

*Sant Jozeph, o patrour benniget,
E kreiz hon trubuilhou, ni c'houlenn ho skoazel.
Difennit, ni ho ped, hor bro muia-karet ; } bis.
Difennit an Iliz santel.*

- | | |
|---|--|
| Hirio 'n hor bro an drouk-sperejou
A zo evel dichadennet.
En ho enep, euz lein an envou,
Ganeoc'h ra vezimp difennet. | Hirio, gant ar memez madelez,
Diouallit mad Iliz Doue.
Gevier ha breinadurez heuzuz
A bep tu deomp en em astenn. |
| D'an Iliz sakr ha d'he merc'h
Satan a ra eur brezel kriz. [hena
Hor bro e karfe digristena,
'Vit essoc'h diskar an Iliz. | Dioc'h ho bilim, Tad karantezuz,
O ni ho ped, deuit d'hon difenn.
Roit deomp bepred ho skoazel ner-
Da veva e guir gristenien, [uz, |
| Guechall ho peuz, enep Herodez,
Laket Jezuz e savete. | Da gaout veldoc'h eur maro euruz,
Hag ar baradoz da viken. |

Kantik ar Zilvidigez.

Ton : D'hor Mamm Santez Anna.

O Mari, o Mamm 'vad,
Grit deomp kompren ervad
Eo ar zilvidigez
Affer vraz hor buez.

Sayetei hon ene
Eo al labour kenta
Merket deomp gant Doue
Da ober er bed-ma.

Peb hini n'hen deuz bet
'Met eun ene ebken ;
Eur vech unan kollet,
Rapari n'heller ken.

D'in-me petra dalfe
Kaout madou ar bed holl,
Ma zaffe, da c'houde,
Va ene paour da goll ?

Talvout 'ra hon ene
Dreist an aour, ar perlez ;
Peb ene d'eun Doue
Zo koustet he vuez !

O pegen diskiant
Ha pegen didalvez
Eo an den dizeblant
Ouz he zilvidigez !

Pa deuio ar maro,
Dioc'htu vezimp barnet ;
Hon ene 'vit ato.
Vo salvet pe zaonet.

Hirio e c'hellomp choaz
An ifern pe an Ee ;
Re zivezad-varc'hoaz
E vezo marteze.

Chench a rankan hirio,
Heb dalé tamm ebet.
Ah ! kousto pe gousto
'Fell d'in beza salvet !

Kantik Sant Izidor

Patroun al Labourerien douar.

Var don : *Kelven*, pe : *Breuriez ar Feiz*.

DISKAN :

*Sant Izidor benniget, patroun al labourer,
Ra vo meulet hoc'h hano, dre holl, e peb amzer ;
Al labourerien douar a c'houlén ho pennoz,
Ma vint ganeoc'h sikouret da vont d'ar baradoz.*

Izidor a oa ganet e Spagn, en eur gær vraz (1),
Hag eno a-vihanik 'vel eur zant e vévas.
Bet hen doa digant Doue kerent mad ha santel
Aketuz da zoursial euz ene ho bugel.

P'e deut en oad Izidor da c'hounit he vara,
Da di eun den pinvidik ez a da zervicha ;
He vestr, hanvet Yann Vergas, hen doa kalz douarou,
Ha ganthan e-oue karget da ren al labourou.

Euruz ar penn-tiegez, pa c'hell fiziout peb tra
En dud a rank da gemer 'n he di da zervicha.
Euruz ar zervicherien a gav tiez kristen
Lec'h ma ve lezen Doue heuillet a beñn da benn.

Bep mintin, sant Izidor oa fidel d'he beden ;
Bemdez zoken oa kustum da vont d'an oferen ;
He holl zevosionou vije achu abred,
Hag euz labour he zvez ne réant gaou ebet.

Daoust ma oa en he labour ar Zant direbech kaer,
Guall deodou hen tamallas divarbenn koll amzer ;
He vestr hen dije kredet, panefed ma plijas
Gant Doue, d'hen didrompla, ober eur burzud braz.

Mestr Izidor, eun devez, da c'hout ar vironie,
A ia var he zouarou da ober eur bale.
Guelet 'ra he zervicher 'kreiz eur park oc'h arat,
Gant daou El guenn 'n he gichen, daou El o labourat !

Liez a vech, dorn Doue a réas burzudou,
Evit lakât da bara muioc'h he vertaziou ;
Eur vech, gant beg he c'harzou, 'n eur skei var an douar,
Ar Zant 'lakas da zével eun eienen dispar.

Meur a vech all, d'he vignoun Doue 'rentas henor :
Diou vech ar boued a greskas dre beden Izidor ;
Ar Zant a oa he galoun ker mad euz ar beorien
Ma kave gras ho guelet, ha rei d'e aluzen.

Ni labourerien douar, evel hor patroun ker,
Hervez bolontez Doue, implijomp hon amzer ;
Pedi, gouzanv, labourat, rei sikour d'an dud kez,
Eo merk ar vuez kristen, guir hent ar zantelez.

(1) E Madrid, kêr kapital bro Spagn.

Kantik Hent ar Groaz.

Ober Hent ar Groaz a zo mont d'ar pevarzek Station, ha chom eur pennadik e pép hini anezho, da zonzal e Passion Hor Zalver, dreist holl er poaniou merket var bep taolen.

Lakât ar spered da zonzal a zo avoalc'h, heb na ve red ober a c'hinou an distera peden. Eun dra vad eo koulzskoude lavaret, e peb Station, eur *Bater*, eun *Ave* hag eur *Gloria Patri*, gant eun Akt a Gontrision.

Devosion Hent ar Groaz a zo talvouduz meurberd d'an eneoù kristen. Deski a ra dezho kassât muioc'h-mui ar pec'hed, ha karet Hor Zalver a greiz ho c'haloun. En eur ober Hent ar Groaz, e c'hellont ive gounit eun niver braz a Iaduljansou, pe evitho ho-unan, pe evit an Anaouen.

Var don : *Au sang qu'un Dieu va répandre.*

DISKAN (dirag an Aoter vraz) :

Heuillomp holl, heuillomp a spered

Jezuz beteg ar C'halvar ;

Sonjomp en he boaniou kalet,

Sonjomp enno gant glac'har.

O Salver leun a-garantez,

Dre ho kroaz hag ho poaniou,

Grit ouzomp eur zell a druez,

Pardounit hor pec'hejou. (1)

KENTA STASION

Jezuz kondaonet d'ar maro.

Da Bilat, 'vit beza barnet

Ez eo kasset Hor Zalver ;

D'ar maro ez eo kondaonet,

Daoust ma oa direbech kaer.

Ha, pa glev ar zetanz douget,

Ne ra ket eur glemmaden...

Pebez skouer a basianted

Deomp-ni holl he ziskibien ! (2)

(1) En eur vont d'ar Stasion genta : *Sancta Mater...*

'Pe e brezonek var ar memez ton :

Grit ma vezo, Mamm beniget,

Gouliou Jezuz krusifet

En hor c'haloun skrivet doun.

Dirag ar Stasion : *Adoramus te, Christe.*

(2) *Pater, Ave, Gloria.*

Ÿ. Miserere nostri... Fidelium... Sancta Mater.

EIL STASION

Jezuz sammel euz he groaz.

Gant he vourrevien d'Hor Zalver

Setu digasset he groaz.

Heb marc'hata e tigemer

Ar bec'h-se var he ziskoaz.

Jezuz, ar c'hroasiou hor bezo

Da zougen hed hor buez

Grit m'ho digemerimp ato

Gant guir feiz ha karantez.

TREDE STASION

Jezuz a gouez dindan he groaz.

Jezuz, dinerzet he vemprou

Gant ar goad hen deuz kollet,

'Gouez d'an douar ; hag he boaniou

Gant al lamm a zo kresket.

Dre an tourmanchou ker skrijuz

Ho peuz 'vidomp gouzanvet,

Grit deomp ato, Salver Jezuz,

Choum heb koueza er pec'hed.

PEDERVED STASION

Jezuz a zigouez gant he Vamm zantel.

Prestik e tigouez Hor Zalver

Gant he Vamm mui-a-karet ;

Hag ho c'halonou ken tener

Gant ar boan a zo goasket.

Kalonou Jezuz ha Mari

Rannet gant hor pec'hejou,

Ni ziouallo da nevezi,

Divar vreman, ho poaniou.

PEMPED STASION

Simon ar Syrenen a zikour Jezuz da zougen he groaz.

Aoun a zav gant he vourrevien

Ne varfe dindan he groaz ;

Lakât 'reont ar Syrenen

Da rei dezhan eun taol skoaz.

Pa vez evidomp re bounner

Ar c'hroasiou 'rankomp dougen,

Tostait ouzomp, o va Zalver,

Plijet-ganeoc'h hor zouten.

C'HUEC'HVED STASION

Ar Veronik santel a zec'h he vizaj da Jezuz.

En eur velet bizaj Jezuz

Saotret holl gant kranch hagoad,

Ar Veronik trugarezuz

D'he gempen a gred tostât.

'Vit an alkto da rapari

A ginnigimp d'Hor Zalver,

Diganthan omp sur, evelldhi,

Da gaout ive grassou kaer.

SEIZVED STASION

Jezuz a gouez evit an eil guech.

Ken dinerz eo breman Jezuz

Ma kouez adarre, siouaz !

Hag, er stad-se ken truezuz,

He boaniou zo kresket c'hoaz.

O va Zalver, eur vech savet,

Mar kouezan-me a neye,

Astennit ho tourn benniget,

'Vit ma savin adarre.

EIZVED STASION

Jezuz a gomz ouz merc'hed Jeruzalem.

Pelloc'h, var an hent e tigouez

Eur rummad merc'hed euz kaer ;

Hirvoudi a reont gant truez

O velet stad Hor Zalver.

Hen ho c'helen da skuill daelou

Var ar pec'hed kaoz d'he boan.

Var he boan, var hor pec'hejou

Gouelomp ive hon-unan.

NAVED STASION

*Jezuz a gouez evit an deirved
gwech.*

Araok mont beteg ar C'halvar,
Jezuz a gouez eur vech c'hoaz.
Daoust d'he boan, ha-daoust d'he
[c'hiac'har

A nevez e samm he groaz.
Jezuz, 'n eur zével heb dale,
C'houi ro deomp-ni eur gentel :
Poania, mar kouezomp adarre,
Poania buhan da zével.

DEKVED STASION

Jezuz tennet diganthen he zillad.

Var ar menez pa zigouezas,
He vourrevien tud diroll,
He vourrevien hen divissall
Dirag daoulagad an holl.
Dre ar boan ho-peuz gouzanvet
Er stad-se, o va Jezuz,
E paeit ar poaniou dlêet
D'an holl bec'hejou mezuz.

UNNEKVED STASION

Jezuz staget ouz ar groaz.

Da rei evidomp he vuez
Jezuz hen deuz eur c'hoant braz,
Ha, poulzet gant he garantez,
En em astenn var he groaz.
Ouz ar groaz raktal eo tachtet
Dre zaouarn he vourrevien,
Red-e-ve kentoc'h lavaret :
Dre zaouarn ar bec'herien !

DAOUEKVED STASION

Jezuz a varv var ar groaz.

Goude teir heur poaniou skrijuz,
Poaniou 'vel ne oue biskoaz,
Siouaz ! setu maro Jezuz...
Stouomp holl dirag he groaz !
O Mari, dre ho rann-galoun
Dirag Jezuz o vervel,
Digant han goulennit 'vidoun
Eur maro mad ha santel.

TRIZEKVED STASION

Korf Jezuz distaget ouz ar groaz.

Gant daou ziskibl trugarezuz
He gorf sakr zo distaget ;
'Tre divreac'h he Vamm druezuz
Ez eo 'laket gant resped.
Pa zaimp dre ar gommunion
Da reseo korf Hor Zalver,
D'hen reseo gant devosion.
Hor zikourit, Mamm déner.

PEVARZEKVED STASION

Korf Jezuz lakeat er bez.

Setu breman he gorf maro.
Sebeliet, douget d'ar bez ;
Mes, d'an trede deiz, ac'hano
E savo leun a vuez.
Va c'horf-me ive a ranko
Mont heb dale d'an douar.
O va Jezuz, grit ma savo
Eun deiz d'an Ee leun a c'hloar.



Hent ar Groaz.

Peden da lavaret dirag an Aoter vraz.

O Jezuz, va Zalver karantezuz, setu me aman daoulinet gant resped dirazoc'h. Deuet oun da c'houlenn ho trugarez evidoun vanan, hag evit Anaoun keiz ar Purgator. Plijet ganeoc'h lakat da dalvout evit silvidigez va ene ar meritou ho peuz gounezet dre ar poaniou ez an brema da zonjal ennoh.

O Mari, o Mamm druezuz, grit m'am bezo perz en druez hag er garantez a ioa en ho kaloun, p'edoc'h o vont da heul ho Mab divin var hent ar C'halvar.

En eur vont d'ar stasion genta : *Sancta Mater*, ha dirag ar stasion : *Adoramus te.*

STASION GENTA. — *Jezuz kondaonet d'ar maro.*

O Jezuz va Zalver, me eo emeuz tennet varnoc'h dre va fec'hejou an holl boaniou a c'houzanvit. Me eo, siouaz ! ar penn kaoz, ma 'z oc'h bet kondaonet d'ar maro. Roit d'in ar c'hrass da gaout eur guir geuz d'am pec'hejou, ha da rapari an dismeganz emeuz great deoc'h. Evit ober pinijen, e fell d'in, divar vremen, digemeret ar maro, hag ar seurt maro a garot choaz evidoun.

Pater, Ave, Gloria, Miserere nostri, Fidelium, Sancta Mater istud agas.

EIL STASION. — *Jezuz sammet euz he groaz.*

O Jezuz, hervez ho kelennadurez : Piou benag hen deuz c'hoant da vont d'hooc'h heul, a dle 'en em zilezel he-unan ha dougen bemdez he groaz. Dirag komzou ken freaz n'euz ket da varc'hata. Kousto pe gousto, red eo d'in digemeret ar c'hroasiou, da lavaret eo ar poaniou hag an trubuilhou a gavin var hent ar vuez. Va zikourit, me ho ped, da zougen anezho a galoun vad dre garantez evidoc'h.

TREDE STASION. — *Jezuz o koueza dindan he groaz.*

O Jezuz, ken dinerzet en em gavit, ha ken pounner eo ive ar deac'h ho peuz da zougen ma kouezit d'an douar. Heb dale avad e savit a-nevez gant nerz-kaloun.

Pa gouezan, siouaz d'in ! en eur pec'hed benag, grit d'in beza kourachuz avoale'h evit sevel buhan dre eur guir binijen. Ha, da c'houde, kennerzit va bolontez, evit miret na vefen trec'het adarre gant ar memez tentasionou.

PEDERVED STASION. — *Jezuz a zigouez gant he Vamm zantel.*

O Mari, Mamm dener, Jezuz ho Mab muia-karet a dremen dirazoc'h en eur stad truezuz meurbed. He velet a rit goalgasset gant he vourrevien, ha beac'h ganthan o tougen eur groaz pounner ha mezuz. O pebez rann-galoun evidoc'h hag evit Jezuz he-unan ! Dre bec'hejou va buez 'oun bet, kaoz da boanion ho Mab, ha kaoz ive d'ho poanion. Pardoun a c'houlennan a greiz va c'haloun da veza bet ken didruez en ho kenver.

PEMPED STASION. — *Simon ar Syrenéen a zikour Jezuz da zougen he groaz.*

O Jezuz, Simon Syrenée a ro deoc'h eun tamm skoazel da zougen ho kroaz. Plijet ganeoc'h ober kement all evidoun, ken aliez guech ma zeu eur boan benag da boueza varnoun. Gant aoun na gollfen kouraj, harpit neuze va zempladurez, en eur asten d'in ho tourn gallouduz.

Ha ma velan va nessa er boan hag en drubuil, ne joumin ket dizeblant en he genver. Hervez va galloud, e sikourin anezhan da zougen he groaz ha da zantellât he boanion.

C'HUEC'HVED STASION. — *Ar Veronik santel a zec'h he vizaj da Jezuz.*

O Jezuz, ar Veronik, heb aoun ebet, a ia betek ennoc'h a dreuz ar zoudard a zo en dro deoc'h. Sec'ha 'ra gant eul lien ho pizaj goloet a c'houezen hag a voad. Var ar lien-ze, dre eur burzud, e oue merket ganeoc'h skeuden ho pizaj santel.

Egiz ar Veronik, ra vezin dispount bepred dirag hoc'h enebourien. Karout a rafen ive rapari an dismeganz great deoc'h dre ar blasphemou. O va Zalver, sikourit ac'hanoun da verka em ene ho vertuziou divin, ma teuin muioc'h-mui da veza henvel ouzoq'h.

SEIZVED STASION. — *Jezuz a gouez evit an eil guech.*

O Jezuz, pa gouezit d'an douar evit an eil guech, e c'houzanvit poanion braz. Ho gouzanv a rit evidoun, abalamour ma 'z oun bet koezet aliez er memez pec'hejou. Eur c'heuz braz

emeuz dezho, ha, divar vrema, e vezin var evez. Guelloc'h e tionalin diouz kement a c'helle va lakât adarre da goueza er pec'hed. Gouzout mad a ran pere eo ar pec'hejou e kouezan ennoh aliessoc'h. Diouz ar re-ze dreist holl e fell d'in poania d'en em ziuall en amzer da zont.

EIZVED STASION. — *Jezuz o konsoli merc'hed Jeruzalem.*

O va Jezuz, klevet a ran ac'hanoc'h o lavaret d'eun nebeut merc'hed euz Jeruzalem : « Na ouelit ket varnoun-me ; gouelit kentoc'h varnoc'h hoc'h-unan ha var ho pugale »

Me ive, me va-unan a diefe skuilla daelou c'houero, abalamour d'am fec'hejou tremenet. Ra zeuio da viana ar zonj anezho da ranna va c'haloun gant eur guir glac'har.

Da verc'hed Jeruzalem e lavarec'h ouzpenn peger spountuz eo mervel e stad a bec'hed. Henvel ouz ar c'hoat sec'h, an den a varv er stad-se a zo strinket raktal, gant justiz ar Barner, e kreiz tan an ifern. O va Zalver, pa rankin mont euz ar bed-man, na bermettit ket e ve neuze va ene paour dizec'het gant ar pec'hed.

NAVED STASION. — *Jezuz a gouez evit an trede guech.*

O Jezuz, evit an trede guech, setu c'houi koezet adarre din-dan ho kroaz. Ne veler ket ac'hanoc'h koulz koude o fallgalouni. Sevel a rit c'hoaz eur vech ; sevel a rit heb dale tamm, evit kerzet a-nevez var hent ar C'halvar.

Ho skoueriu santel a ro sklerijen d'am ene. Koumpren a ran guelloc'h e tle an den, eur vech koezet er pec'hed, en em denna buhan euz eur stad ken noazuz ha ken danjeruz. Koumpren a ran ive ne dleer morse disfiziout euz ho trugarez, n'euz forz pegen aliez e vezer koezet er memez pec'hejou.

DEKVED STASION. — *Jezuz divisket gant he vourrevien.*

O va Jezuz, guetel a ran ho pourrevien didruez o tiframma ho tillad diganeoc'h. Gouliou ho korf sakr 'zo digoret a-nevez, hag, euz hoc'h holl izili, ar goad a red adarre muioc'h eget biskoaz. Poanussoc'h e kavit c'hoaz an dismeganz a bouez varnoc'h, pa 'z oc'h divisket dirag an holl.

Dre ar boan ho peuz neuze gouzanvet en ho korf hag en hoc'h ene, roit d'in ar c'hrass da gaout alo heuz ha donjer ouz an holl bec'hejou mezuz.

UNNERVED STASION. — *Jezuz staget ouz ar groaz.*

O Jezuz, n'euz den ebet evit kounpren peger kalet eo ho poanion, pa 'z eo staget ho korf sakr ouz ar groaz. Eun druez eo klevet an taoliou morzol a blant tachou braz en ho taouarn hag en ho treid ; eun druez ive ho kuele, savet en ær, ha dal-c'het eno var bouez ar pevar gouli great deoc'h gant an tachou. Setu aze al labour milliget emeuz great dre va fec'hejou. Keuz emeuz dezho ha pardoun a c'houlennan dre verit ho poanion.

DAOUZKEVED STASION. — *Jezuz a varv var ar groaz.*

O Jezuz, mil bennoz deoc'h da veza gouzanvet eur maro kriz evit silvidigez va ene. Anéz ho madelez hag ho trugarez heb muzul, e oan kollet da viken.

Divar vrema, beteg fin va buez, e talc'hin da ziskouez deoc'h karantez evit karantez, ha da veza bepred anaoudek en ho ken-ver. P'e guir ez oc'h maro evidoun, e rankan da viana beva evidoc'h, en eur lakât e pep tra va bolontez a-unan gant hoc'h hini.

TRIZEKVED STASION. — *Jezuz diskennet euz ar groaz
ha lakeat etre divrec'h he Vamm zantel.*

O Guerc'hez zantel, o Mamm glac'haret, anzañ a ran ez oun bet kriz ha dinatur e kenver ho Mab, hag en ho kenver hoc'h-unan. Ma n'euz breman etre ho divrec'h nemet eur c'horf maro, dispennet a bep tu ha ruziet gant ar goad, me eo, siouaz d'in ! me eo a zo kaoz.

O Mari, plijet ganeoc'h koulz koude ober eur zell a drugarez var va ene paour. Pardounit d'in an torfed heuzuz emeuz great, pa 'm euz lakeat ho Mab muia-karet d'ar maro. Goulennit digant-han, me ho ped, ma roio d'in ar pardoun euz va holl bec'hejou. Va zikourit ive da skriva doun em ene poanion he Bassion.

PEVARZEKVED STASION. — *Jezuz lakeat er bez.*

O va Jezuz, gant daou euz ho tiskibien ez eo lianet ho korf zantel. Gantho ive eo douget beteg ar bez, ha lakeat eno gant kalz a garantez hag a resped.

Pa blijio ganeoc'h disken em c'haloun dre ar gommunion, ho pet ar vadelez d'am zikour, ma c'hellin ho reseñ e stad vad. Grit m'ho resevin bepred gant feiz, gant resped ha guir garantez. En doare-ze, oun sur e teuo da vir ar goulenn great evidoun gant ar belek, pa ro d'in ar gommunion : ho korf sakr a ziuallou va ene beteg ar vuez a bado da viken.

Kenteliou ar Groaz.

Var don : *D'hor Mamm Santez Anna.*

DISKAN :

*Kanomp holl, kristenien,
Kanomp a vuez huel :
Breman ha da viken
Henor d'ar Groaz zantel !*

Bepred, elec'h ma vo
Dirazhan Kroaz Jezuz,
Eur c'hristen a gavo
Kenteliou talvouduz.

Kroaz an tour.

Divar beg an touriou
Ar Groaz 'lavar dalc'hmad :
« Kristenien, d'an envou
Savit ho taoulagad ! »

Kroaz an hent.

Ar Groaz var an henchou
'Lavar d'an tremener :
« Guir hent bro an envou
Ec'hent Kroaz Hor Zalver. »

Kroaz an ti.

Dirag holl dud an ti,
Ar Groaz ouz ar voger
A zesk da bep hini
Derc'hel mad d'he zevel.

Deski 'ra d'ar bugel
Beza bepred sentuz ;
Senti betek mervel
Zo bet buez Jezuz.

D'an tadou ha mammou
E lavar Hor Zalver :
« Beillit var eneo
Emeuz prenet ken ker ! »

Kroaz an ti d'ar c'hlanvour
Zo ive presiuz ;
Ennhi e kav sikour
Da veza gouzanvuz.

Kroaz ar gador-govez.

Kroaz ar gador-govez
A ro kez d'ar pec'her.
Bet eo ken didruez
E kenver he Zalver !

Kroaz ar beziou.

Ar Groaz var ar beziou
He deuz eun nerz dispar
D'ober d'ar c'halonou
Dougen pouez ar glac'har.

Kroaz an aod.

Ar Groaz, pa ve savet
E kichenik an aod,
A ro fizianz bepred
D'ar paour kez martolod.

Kroaz ar varn diveza.

Pa zeui, da fin ar bed,
Jezuz evel barner,
He Groaz a vo guleet
O lugerni en-ær.

En eur velet ar Groaz
An dud fall a greno ;
An dud vad gant joa vraz
Er c'hontrol a drido.

Grit deomp, Salver Jezuz,
Dre verit ho poanion,
Gant an holl dud euz
Mont neuze d'an envou.

Peden d'Hor Zalver stag ouz ar groaz.

*Indulgans plenier da
c'hounit pe evi-
domp hon unan
pe evitan Anaoun,
var bouez : 1^o Ko-
vez ha kommunia;*



*2^o Lavaret pe kana
devot ar c'hantik-
ma dirag imaj ar
grusifi ; 3^o Pedi
evit ezomou an
Iliz.*

Var don : Elez euz ar baradoz.

Jezuz mad ha dous meurbed, dirazoc'h daoulinet,
Gant brassa nerz va ene, m'ho ped hag hoc'h asped
Da skriva d'in em c'haloun, da skriva ennhi don
Feiz, esperanz, karantez ha guir gontrision.

E kreiz va c'haloun ive lakit, o va Jezuz,
Da gorrija va buez, bolontez vad, nerzuz,
Epad m'emaoun, gant glac'har ha gant karantez vraz,
O sonjal 'n ho pemp goul, o sonjal enno c'hoaz.

Dirazoun, Jezuz ken mad, e velan ar c'homzou
Hen doa ar profet David laket en ho kinou :
« Toullet ho deuz va daouarn ; va zreid ho deuz toullet,
« Ha betek va holl eskern gantho zo bet kountet. »

Kantik nevez evit Miz Mari.

Var don : O nag hir eo an noz.

Setu deut adarre miz Mae, miz ar bleuniou,
Ar miz he deuz choazet Rouanez an envou.

Aman, epad eur miz, e tiredimp bemnoz
Da veuli ar Verc'hez, da c'houlen he bennoz.

Bemnoz, a greiz kaloun, ni gano assamblez
Hor c'hantikou kaera en enor d'ar Verc'hez.

Bemnoz, dirag he zron, gant guir fizianz ennhi,
Devot ni lavaro : « Me ho salud, Mari ».

Bemnoz vo mall ganeomp klevet he c'henteliou,
A zesko deomp guelloc'h kerzet var he roudou.

Ar boan a gemerimp ne vo ket poan gollet :
Varnomp nag a c'hrassou bemnoz a vo skuillet !

Mari, hor zikourit d'en em ziuall bepred
Dioc'h an diaoul milliget ha skoueriou fall ar bed.

Pa vo, gant ar glac'har, rannet hor c'halonou,
Ho pet ar vadelez da zec'ha hon daelou.

Benniget hor c'herent hag holl dud ar barrez ;
Grit ma reno bepred an urz vad 'n hon touez.

Plijet ganeoc'h ouzpenñ pedi 'vit an Iliz,
Ma kavo en hor bro ha peoc'h ha guir frankiz.

Da heur va zremenvan, o n'am dilezit ket ;
Difennit ho pugel enep an drouk-spered.

Ra vo ganeoc'h d'ho Mab kinniget va ene,
Ma vo ganthan raktal digemeret en Ee.

Induljanz ar Maro mad.

Hon Tad Santel ar Pab hen deuz bet ar vadelez da lakât Induljanz braz ar maro mad kalz æssoc'h da c'hounit. Peb hini a c'hello breman gounit an Induljanz-se, epad zoken ma vezo c'hoaz var he yec'hed, hag e talvezo dezhan a benn ma rento he ene da Zoue. N'euz ken d'ober nemet mont da govez ha da gommunia (d'an deiz ma karer) ha, goude beza kommunit, kana pe lavaret devot ar beden-ma :

Ton : *Elez euz ar baradoz.*

O va Aotrou, va Doue, n'euz forz pe seurt mario
A garot choaz evidoun, me fell d'in hen reseo ;
Euz ho tourn, a greiz kaloun, m'en reseo a-vrema,
Gant holl anken ha poaniou va amzer diveza.

TAOLEN

1. Kantik en honor d'ar Zakramant	1
2. Kantik an Oferen	2
3. Kantik da Zant Jozeph	3
4. Kantik ar Zilvidigez	4
5. Kantik Sant Izidor	4
6. Kantik Hent ar Groaz	6
7. Hent ar Groaz	9
8. Kentelion ar Groaz	13
9. Peden d'Hor Zalver stag ouz ar groaz	14
10. Kantik nevez evit Miz Mari	15
11. Induljanz ar Maro mad	16

Imprimatur :

Kemper, 15 a viz C'huevrer 1908.

F. CORRIGOU, Vic. gen.

Kemper, moulet e ti de Kerangal.

Kantik Bugale Mari.

Ton : *Ni ho salud, Rouanez an Elez.*

DISKAN :

*Guerc'hez Vari, pa 'z omp ho pugale,
Plijet varnomp beilla e pep mare.
Goulennit deomp digant ho Mab Jezuz
Buez santel hag eur maro eurus.*

Pebez gened eo gened ar Verc'hez,
Krouet dinam ha leun a zantelezh,
Mil guech splammoc'h eget bolz an envou,
Mil guech kaeroc'h eget ar bokedou !

Bugel Mari a dle, evel he Mamm,
Kaout eur galoun bepred pur ha divlamm,
Poania ouzpenñ da lakât he ene
Kaeroc'h-kaera bemdez dirag Doue.

Buez Mari, epad he yaouankiz,
Oa direbech ha santel e peb giz.
Plijout d'ar bed ne c'hoantêas morse ;
Kaloun Mari a oa holl da Zoue.

Ne vo biken guir vogel d'ar Verc'hez
Neb a garo ar bed, he follentez.
D'ar Verc'hez pur e plij 'n he bugale
Al lilien, skeuden ar burete.

Bugel Mari d'an holl, gant guir aked,
A dle deski lezen ar barfeted.
He dever eo, e peb lec'h ha bemdez,
E pep doare, beza skouer ar barrez.

Evit senti ouz mouez he Mamm dener,
Evit digoll Kaloun dous Hor Zalver,
Bugel Mari aketuz a dosta
Ouz an daol zakr bep miz da nebeuta.

Bugel Mari da bep reunion
A zeu fidel, a zeu a vir galon.
Eno e poagn da zelaou, da bedi ;
Eno e kan henor, gloar da Vari.